

第一六〇冊

方輿彙編

職方典

常德府部

辰州府部

永州府部

(卷)

二五—二六

二六—二七

二七

古今圖書集成

中華書局影印

古今圖書集成
目錄

卷一

古今圖書集成

中華書局影印

欽定古今圖書集成方輿彙編職方典

第一千二百五十九卷目錄

常德府部彙考五

常德府風俗考

常德府祠廟考 寺觀附

常德府驛遞考

常德府兵制考

職方典第一千二百五十九卷

常德府部彙考五

常德府風俗考

本府 武陵縣附郭

府志

漢書地理志云民食魚稻以漁獵山伐爲業又

云飲食還給不憂凍餒亦無千金之積

武陵記人氣和平多淳朴少宦情有虞夏遺風

楚辭九歌註沅湘之間其俗信鬼而好祀其祀

必使巫覡按楚開文字之始者屈子其所稱帝

稱神者不一如湘君湘夫人東皇太乙司命山

鬼國殤之類皆從俗以爲詞者也屈子猶且不

免况其他乎謂之信鬼好巫或亦其有之者

宋鍾蜚英學記常武爲守節禮義之國

元志居民務本勤於耕織

元史節翁樂記鼎城爲文物之邦

武陵古望邑衣冠禮樂爲名區文物甲湖右

玉海鎮節賦武陵桃源是謂有常之域

關尊德燕賢序文物之風再行呶唔之聲盈耳

周瑛學記人才爲湖南之冠

元旦 是日男女晨興各盛服拜祖先畢拜父

母及以次尊長然後出謁親戚鄉黨不相見者

投刺大約三五日與他方略同出必擇吉方與

吉時三日不掃除舍

立春 觀土牛以牛首紅白等色占水旱等灾

以勾芒鞋帽占寒暑晴雨人家近有以生菜作

春盤茹春餅親友會飲謂之春臺席

上元 剪紙爲燈糊以竹格飾以五彩有繡毯

走馬蓮花諸類雖無閩浙刻絲等項亦頗精巧

好事者作成燈謎夜則相聚以猜名曰打古燈

婦女成隊宵行名曰走百病各家以椒爲湯入

薑菜諸果物人至而飲之謂之時湯又作麪窩

如雞子大者十二以象十二月每窩標記某月

用甌蒸之如炊飯然久之取視水淺深有無以

稽某月之水旱悉多有驗至十九夜燒燈

社日 鳩錢買牲醴賽會相飲而罷鄉村即以

是月浸破種穀

清明 插柳於門人簪一嫩枝謂能辟邪具酒

食掃墓以竹枝懸紙錢而插之謂之標墳

端午 俗重此節是日懸艾於戶食角黍切菖

蒲和雄黃泛酒飲之又以雄黃噴室塗小兒耳

鼻舊相沿有泛龍舟之戲其初不過鄉人習爲

競渡近則角勝負竟有毆傷溺死之異構訟無

休反爲俗累今已禁止

中元 各家備牲醴以祀祖先

中秋 設酒果對月飲之名曰賞月即以月之

明暗占湖魚之有無暗則有魚且卜來歲元宵

之晴雨諺曰雲掩中秋月雨打上元燈

重陽 飲茱萸酒蒸菊花糕相約登高效孟嘉

龍山落帽故事

冬至 俗以爲重每作米麪食相餽及坊衢中

交賀略如元旦儀

歲除 歲將盡數日前鄉村多用巫師朱裳鬼

面鑼鼓喧舞竟夜不止名曰還儺此亦信鬼好

巫之一驗也二十四日掃除舍宇祀竈除日易

門神桃符春帖姻友之家以酒果之類互相餽

送作米麪食以爲迎新聚飲之儲至夜燒爆竹

辟瘟丹飲分歲酒或竟夕不成寐曰守歲

桃源縣

晉桃花源詩俎豆猶古法衣冠無新製

舊志民性質朴郊野事漁獵嫁娶不親迎喪事

用浮屠疾病用鬼巫少服藥藝不求工商不致

遠士少宦情不好詞訟素號易治

龍陽縣

元納加臺亭記視鼎澧諸邑文學爲盛

舊志地瘠民貧風俗淳朴山野之中以農桑爲

本水澤之中以網罟爲業

新縣志楚俗信鬼好巫龍陽爲甚鄉市每歲首

數日遊儺索祭人有疾則曰降神吉則曰還願

城市尚奢餉客每豐簋亦好施與如募修之類

西南山村耕織販負相半頗稱勤樸惟服毒輕

生爲惡耳

親迎禮廢喪事尚酒宴饗友朋樂義舉凡居父

母喪不能成禮者男女不能成姻者咸出貲助之曰孝友會曰喜會輪次相償

沅江縣

舊志地僻民稀田低土瘦人性愚懦懼於爭鬪湖汊爲居網罟是利歲時所尚頗同本府

附清陵亭長武陵競渡略

競渡事本招屈實始沅湘之間今洞庭以北武陵爲沅以南長沙爲湘也故划船之盛甲海內蓋猶有周楚之遺焉宜諸路倣倣之者不能及也

舊制四月八日揭篷打船五月一日新船下水五月十日十五日划船賭賽十八日送標訖便拖船上岸今則興廢早晚不可一律有五月十七八打船二十七八送標者或官府先禁後弛民情先鼓後罷也俗語好事失時者云打得船來過了端午至今不足爲謂矣

船一以杉木爲之取其性輕易划得燥木爲龍骨尤妙一船司命全在龍骨生硬橈軟使船不進皆龍骨病也其次在簾篋以麻札竹相續爲之繞船首尾急束數十番然後互相穿度勾絞爲織此一船之筋以前後促緊如弓梢船行身不動爲良否即韁水易敗也

船式長九丈五尺最爲中制過長有十一丈五尺者短至七丈五尺止此武陵郡中船也俗說長船短馬大意以坐橈多者爲勝實不盡然有長之驚緩不及短之精悍者其他湖泊溪港所在有船短不及式或時飾他船水嬉而已賭賽

無取焉

凡船決賭以選橈爲第一義橈手俱出江南打魚家以姓著者曰段家芮家以地著者曰德山德山港其人謂之水老鴉狎巨浪如枕席者也凡散橈皆以銀米先期占募健兒至期挑選用之有畏生事不上船及婦惜夫不聽募者須紅布三五尺可得亦猶款胡用脂粉之屬焉一種江頭給牒之人抱甕灌園不以漁爲業其橈輕少無力謂之菜橈子咸黜不用

凡選橈法先遣兩橈共一船相背而划以知強弱謂之兩頭忙復合十餘橈分左右翼急划數轉如盤蟻封以觀整亂謂之渦兒旋大抵左橈難於右橈猶射左右開弓之有鈍利也

船以簾爲中線虛縛船上簾前後立者頭梢二人簾中立者旗鼓拍板三人和簾不拘人數多不過四五少或無之簾下施橫木約二尺許一枚如梯枕子相次左右坐橈處也船過十一丈可坐八十橈九丈者六十餘橈七丈者四十餘橈行船以旗爲眼動橈以鼓爲節橈齊起落不亂分毫亂者黜之謂攪槳手與橈相應唯拍板聲最妙如出橈間響戛空水諸處不用拍板唯武陵爲然或代以金失之愈遠

和簾一名和橈劉禹錫競渡曲註曰競渡始於武陵至今舉楫而相和之其音咸呼云何在斯招屈之義然則和簾亦疑和楫之訛也去古漸遠不聞何在之聲第相呼曰拏橈拏橈莊子漁父杖拏而引其船陸游老學庵筆記鼎澧謂拏

子爲橈義兼諸此

划船當郡城之中遠者自漁家港來沿流十五里自白沙渡來沂流三十五里計一日之間五十里內旗鼓闐然而徘徊往還與賭賽之地不過十里間耳江南上至段家嘴下至青草嘴江北上至上石碓下至下石碓面勢闊遠堪爲賽場南則芳草茂林雪沙霞岸北則危樓畫檻古堞重城觀者於此鱗集劉禹錫詩風俗如狂重此時縱觀雲委江之湄斯實錄矣

賽船雖有上下長江南北分江之名然不足爲準惟自北而南橫江互競兩船約略齊驅須到彼岸與否爲輸贏的據范曄競渡賦曰聿來肇自於北津所屆眇期於南浦殆謂是也五月沅江漲落不時隔岸迂捷俄異慣船者皆深識水候兼船所直之方不差毫末先勝而後戰焉否則浪戰敗矣記船以鼓大約橫江漲時二百六十槳逐岸增損不能悉載

凡船賭賽雖一江之中彼己形見猶狙詐百端或前驅中流整陣待敵或卷旗臥鼓發伏爭先或乍進乍止以屢出相疲或一縱一橫以分途並扼或甲與乙賽丙先爲誘迫甲乙成賭丙旋抽回謂之送船或甲強乙弱讓乙先行却後追去謂之趕船計路以船有趕半船一船路甚至五船十船者贏亦如之謂贏半船一船路甚至五船十船也又或量力不進遇敵先逃謂之怯船本無關心優游竟日謂之演船其人久習船事足智多姦謂之老水後生輕銳不測成虧謂

之新水雖勝亦倖也

武陵唱山歌多竹枝遺意白居易詩江上何人唱竹枝前聲曳斷後聲遲唯武陵人歌曳後斷斷後遲爲備其體亦時有新語出漁翁馬隸口中奇快可賞龍船歌則不然兒童所傳終老無異每唱四聲前聲畢餘耶野二音後聲畢餘阿珂二音而已亦有相沿套頭如石榴花葉兒青之類爲起興語臨時撰足四句彼此相嘲鄙俚無足道抵暮散船則必唱曰有也回無也回莫待江邊冷風吹其來甚遠按隋書地理志屈原以五月望日赴汨羅土人追至洞庭不見湖大船小莫得濟者乃歌曰何由得渡湖因爾鼓棹爭歸競會亭上斯則有也回無也回之義乃數千年之語也

武陵東門外舊有招屈亭劉禹錫詩昔日居鄰招屈亭競渡曲云曲終人散空愁暮招屈亭前水東注斯隋志競會亭上之驗其地本名屈原巷近有小港名三閭河蓋原生平所遊集也俗傳競渡禳災風俗通曰五月五日以五絲繫臂辟兵及鬼令人不病瘟亦因屈原荆楚記曰五月五日並蹋百草採艾爲人懸門戶禳毒氣又曰屈原以是日死並將舟楫拯之蓋兩事合爲一耳梅堯臣譏原好競渡使民習尚之因以鬪傷溺死一歲不爲輒降疾殃失愛民之道劉敞作屈原歌辭言競渡非原意以曉聖俞辯說繼起余謂楚俗尚鬼原生時放逐沅湘親觀淫祀山鬼國殤何與人事而皆爲之辭蓋其俗有

不可變者也况原以忠直憤塞蹈身洪流民秉之良目謀懽悴耳屬牢騷震駭未有憑一葉之舟墮千古之淚亦何傷乎江南卑濕溫暑司辰王侯駕言士女于邁抑亦山陰之禊竹汝南之插萸也使其可已何俟今日

今俗說禳災於划船將軍具牲酒黃紙錢直趨下流焚酹詛呪疵癘天札盡隨流去謂之送標然後不旗不鼓密划船歸拖置高岸堵閣苦蓋以待明年卽今年事訖矣爾時民間設醮預壓火災或有疾患皆爲紙船如其所屬龍船之色於水次燒之此本韓愈送窮具車與船之意亦非苟作

桃符兵罐二物船人臨賽擲之以祈勝非也桃符能殺百鬼乃禳災之具兵罐中所貯者米及新豆之類按續齊諧記楚人哀屈原每至五日竹筒貯米投水祭之漢建武中長沙歐回白日忽見一人自稱三閭大夫教回以楝葉塞筒五絲絲縛免爲蛟龍所竊自是世有楝葉粽并帶五色絲此兵罐盛米乃竹筒之訛未有角黍以前之遺制也

划船不獨禳災且以卜歲俗相傳歌花船贏了得時年只此一句無上下文不知所自始而頻有其驗儲光義觀競渡詩曰能令秋大有鼓吹遠相催然則其來已久蓋未有好事划船非樂歲者也龍船歌耶野阿珂餘音唯武陵爲然諸處不爾一云其音爲些些本招魂楚些之遺弔屈意也按宋玉招魂帝告巫陽有人在下我欲

輔之魂魄散失汝筮予之蓋原已死時語今划船用巫寔始於此說者乃謂玉徇楚俗生用此法於原似未爲得

划船用巫陽爲厭勝或走聘名巫於萬山中謂之山老師法力尤高大約划船先夜頭人具牲酒倩巫作法從船首打舳斗至尾撒蒿燃火名曰亮船鼓徹旦不懈以防敵巫偷作幻術或捕得之捶死無悔

划船之日巫舉油火發船以其紅黑高下占船之勝負歷歷不爽巫所奉神名西河薩真人詛呪有蠻雷猛火燒天等術手訣有收前龍息陰兵移山倒海等術卷禪露足跳罡七步持水激火火起船行呪詞有天火燒太陽地火燒五方雷火執常法燒死諸不祥龍舟下弱水五湖四海任颺揚云云船底在水中用白茅從首至尾順拂一過亦防敵人暗繫諸物以成滯澀餘法祕妄不能悉知

划船擇頭人必有身家拳勇者爲之前數日刊梨棗一片上畫龍舟下書詞調蒸麪爲餅餌遍送所隸地方索報以金錢親戚或有力之人派供酒飯以供具盛者爲平生有行止之人亦有尋常許愿供酒飯者其日江中小艘揭黃錢二樹彩聯鼓吹而往卽供飯船也凡供酒飯雖船人醉飽必強飲食之顆瀝不留餘則撒江中盤箸亦擲諸水不復攜去至晚散船人家競取船倉中水礪百草爲浴湯云可辟惡斯皆被禳之類也

船人無不習水善游惟頭旗鼓拍四人不必善水則皆寄命橈手是日划船悉頂巫師符篆及製黃赤小旗取鷺鷥毛插鬢間厭勝物也觀者樹紅綠彩或製句彩上俟船過賞之凡船所經係其隸地放爆竹黃烟揮扇喝采相和否則群聲合譟以擲揄之怒者掣屋瓦飛擊如雨船人橫橈舞掌作勢相應云

花船廟神曰梁王其像冕服侍衛兵仗甚嚴乃東漢梁松代馬援監軍征五溪夷者也土人祀之陽山劉禹錫詩漢家都尉舊征蠻血食於今配此山又曰梁國三郎威德尊即此江南有廟郡人祈嗣踏青桃李甘菊花時率往遊焉划花船則有事茲廟刻神像於龍之首塗其鱗尾五色兩旗白質龍文或刺或繪五色頭梢旗鼓和拍之人服黃白色所隸地曰神鼎清平常武三門及七里橋賽花船鱗尾旗服多同花船其廟神曰靈官所隸地曰漁家港竹竿灣等處紫船鱗尾旗繪皆紫服黃白色廟神曰李才將軍手赤棒典江湖舟簾未詳所出所隸地曰槐花堤清泥灣白船鱗尾旗服純白廟神曰老官曰羊頭三郎竹馬三郎皆一手操橈一手或拳或弄綵毬古有竹郎神未知是否所隸地曰拱辰永安二門及善德山烏船鱗尾皆烏紅船鱗尾皆紅旗皆赤色服皆純青諸船橈服襪色此兩船橈亦純青廟神曰黃公大伯二伯三伯黑面手操橈相傳兄弟皆旋客溺水為神者也所隸地曰臨沅門大河街德山港蘇家渡白沙村大抵

廟神多不經莫由釐革姑紀其寔如此

諸船分界唯士民割據勝負鬻爭兒童婦女無肯遜人一語或祖居此船遷居彼船只認祖居者過半或居此船而不爭船其黨人憎之謂沒志氣納降書攔桶子凡與人手談拇陣角飲爭言勝或口稱鬻鬻打鼓聲也或張兩袖舞稱贏了贏了和橈勢也流俗酷溺如此若榮府建邦啓土道府縣公署臨民雖在諸船界中無屑屑分畛之理俗兒亦以市井見分之細甚矣

船中兩旗方幅各尺五寸以布為之楚辭乘回風兮載雲旗韓愈羅池廟碑曰侯之來兮兩旗度中流兮風泊之此亦迎神之物也

划船招屈良有深意不獨感興汨羅楚辭乘船船余上沅兮齊吳榜而擊汰船容與而不進兮淹回水而凝滯此原生平遭遇掩抑連遭後人寫之疾鼓輕橈轟霆捲雪庶一洗其不平之氣耳又曰朝發枉渚兮夕宿辰陽沅與枉渚皆武陵水名

龍船不施頭角或試施之一再行即取去唯刻木鱗三尺豎船首謂之鵝頭頭人所倚立者也相傳昔河汭龍本造黃龍船施頭角鱗爪體似真龍鼓行沒水百無一人出者故皆以為戒亦云橈出德山龍井中黃船用是始廢不誣也青船舊隸清平門外謂之青竹標不知何時廢今小廟存焉

江上看船北岸樓有三四層自清平門至下石碓其長五六里皆前期爭納儼直多至數百文

緩即為人占去至日提壺挈榼馬步魚軒肩摩道上已牌則畢集矣盤中佳果有韓家李麥黃桃新味有鮓魚蓴菜嘗鼎一臠下鼓千里方共清談浪笑忽聞船賽莫不停杯變色倚檻瞪眸是耶非耶若得若失元黃自戰勝負俄分於時或氣湧如山可以踏江穿屋或顏灰若死不知下殿辭樓騰飛天而雉伏蒿龍為魚而鼠變虎殆未足以極其情狀也

看船儼樓亦各有城花白諸船人不入烏船域烏紅船人不入花船域有互入者非忘情不能若非闕不敢亦往往凶終不如不入之為愈也人衆樓少故有江南之食單江中之舡艦水陸蔽虧莫可算數在江南者看橫渡到岸極審然船將到岸非其隸地則岸頭飛礮擊之船人或揮橈挺鬪玉石莫分居江中者易碍諸船往來之路或正當賭賽之衝引避不及立成泥矣若取其點綴江南果蘇觴豆滿眼可沾江中落日金鼓喧闐瓜瓢舡舫皆揚袂折柳危足踏舷而舞亦諸方未有之盛觀矣

凡官府看船往時多在寓賢閣神鼎樓縣麗譙臨沅樓等處結綵張筵諸船始至必恭嚴鼓勒橈急划搶岸頭人轉面鵝項跂足點頭拍岸仍登樓徧叩官給花紅賞之後至者有鞭扑之懼今寓賢閣圯久矣寓賢者誰本朝薛文清為御史監沅州銀場往來巡寓王文成迂逆瑾謫赴龍場旅寓處也凡船賽勝則以梢為頭倒轉划之人皆豎橈舞

柳鳴金鼓吹船中過所勝之船地方掩抑數四負者或勉爲之而神不王或不相及遠則眞服輸寂寂然矣日晚散船頭家具酒飯滿船俱集勝者加豐鄰里親知踵門稱賀明日結綵於門開尊演戲或書對聯小令於城門縛狗懸龜繫芎藭草果諸物以嘲負者負者地方之人偶過其下則垂首去或親友封致前物以相諷云自四月說船便津津有味五月划後或勝或負談至八九月間沾沾未厭也

或曰划船之說備矣梅聖俞云鬪傷溺死其能免乎則應之曰龍船不易溺於諸船也鬪則溺耳於競渡時而莫鬪船中禁藏竹竿鴉子石兩岸禁擲瓦一捕尉力何難焉若尋其本限爲小船長不滿五尺橈不過三十人寧以一船之費爲兩三船恣其戲而殺其力勢自不至於鬪矣不鬪亦不溺矣前不云乎使其可已何俟今日如欲已之而未可得是說而存之其庶幾乎

常德府祠廟考

府志

本府 武陵縣附郭

山川壇 在府東門外二里舊同社稷壇洪武二年改遷正德四年移遷榮府城內後廢知府胡向華仍重建於東門外
社稷壇 在府西門外二里明洪武二年知府張子俊創砌正德四年移遷於榮府城內後廢
皇清康熙七年知府胡向華重修擇地於府城西門外建壇一所

郡厲壇 在府北三里黃華橋畔洪武二年知府張子俊建正德二年以城南之養濟院併入是壇知府陳希文知縣應能相繼建廳五間及廂房各三間

皇清康熙七年知府胡向華重修

里社鄉厲二壇 在府城西門外各縣鄉保俱有

旗纛廟 在府治南

城隍廟 去府治一里洪武二年知府張子俊建正殿五間穿堂二間後殿三間東西兩廊六間大門三間洪武時以助國有功勅建書樓一座於會仙橋畔右有火神祠成化間知府楊宣葺修正德十四年郡人李文重修嘉靖六年知府方仕復修萬曆年間頹敗不堪郡人龍德孚捐貲倡修丙寅年以火祠廟俱毀郡人羅尚質捐金合郡助修後兵火丘墟

皇清康熙七年知府胡向華鼎建

伏波廟 在府城南江濟伏波將軍馬援征五

溪蠻有功因祀之俗稱馬王廟址存今改爲三

賢祠

關公廟 在治西北三國時羽仗義歸蜀安集

南郡故郡人祀之天啓丁卯火燬郡人楊鶴捐

貲倡修

張公廟 在新街口東扁題雙忠祠相傳以祀

張巡許遠

忠佑廟 在府境內宋刺史程昌寓有弭盜安

民之功故立廟祀之

英佑侯廟 有二一在東門外一在清泥灣皆先年商民建之以祀蕭晏二神蕭名天任晏名戊仔俱江西臨江人生有異相沒後著靈於江湖間蕭累封爲水府靈通英佑侯晏爲平浪侯五顯廟 在縣學後即華光廟賓興年兩學赴試於此祈福

朱三廟 在府西

陽山廟 舊志漢時郡人建以祀陽山之神在府城東北三十里陽山之嶺後因展祭不便又建行祠於府治東北以每年十月祀今廢址存四賢祠 在府學泮宮坊前嘉靖十六年建以祀楚大夫屈原漢將軍馬援宋前武陵尉唐介湖北制置使岳飛後知府陸垹拓前隙地構祠堂三間翼以廂房前爲大門後爲曠感堂三間善卷祠 在德山上有善卷先生古壇并讀書臺即今之孤峰頂

二妃祠 在府治西二妃娥皇女英也即屈原

九歌中湘君湘夫人

屈原祠 在府東二里每年五月五日競渡以

祀

三閭祠 在府東二里五月五日競渡以祀屈

原

張虛白祠 在天慶觀後今廢僅遺斷碑其字

浸滅不可讀

都土地祠 在府治後

文昌祠 在縣學東南

烈士祠 在善濟山上祀唐人哀映有闢邪崇

正之功

天王堂 一在清平門內一在常德衛壯國坊前

桃源縣

山川壇 在縣東二里

社稷壇 在縣西三里

邑厲壇 在縣北二里

城隍廟 在縣東一里

伏波將軍廟 在縣南三里嘉靖十年知縣汪洋重修

關公廟 在縣東三里明隆慶五年洪水漂沒知縣張植重修明末廢

皇清順治十五年所存土像白晝動搖數日觀者如堵辰常鎮標將領親見請於主帥捐費以兵力蓋造

東嶽廟 在縣東一里

蘇公祠 在關王廟旁明萬曆四年知縣鄭天佐爲本縣耆老蘇彬勸建今廢

龍陽縣

山川壇 在縣南一里龍潭門外

社稷壇 在縣西一里明洪武初知州段旻建

成化間知縣周泰重修

邑厲壇 在縣北洪武初知州段旻建於城東北成化十四年知縣周泰遷建今處

城隍廟 在縣東宣德二年知縣韓瑄建嘉靖十一年知縣黃豫重修按龍陽縣志

皇清康熙二十一年知縣李滋奇捐資重修

張大帝廟 在縣南一里祀漢張渤渤字伯奇本縣人生而神異長而奇偉後有功茲土故邑人祀之

潘將軍廟 在縣西半里祀吳將軍潘濬濬常駐軍是邑有功於民有司歲時致祭

洪沾水神廟 在縣東一百八十里洞庭湖西

洪沾州上里人相傳云祀漢柳毅廟側亦有柳毅井凡舟楫往來過湖者輒乞靈焉

東嶽廟 在縣東久經圯壞

皇清康熙十八年僧照緣修二十四年復修後宇並新樓二層制甚弘敞

洪山廟 在縣南一里

忠惠祠 在縣東二百步祀本縣典史青文勝洪武間文勝常上疏捐軀以免租有惠於民成化十一年知縣周泰建祠祀之正德三年巡按御史翁理以祠地狹隘重給存畱倉空地以益其祠知縣韓光表建立正堂三間大門一間嘉靖八年知縣黃豫重修

皇清順治年間殿康熙九年知縣王萃又重修之

仙翁祠 在縣南六十里金牛山上

沅江縣

山川壇 在縣東半里

社稷壇 在縣東舊在縣北半里嘉靖十四年知縣鄭珊遷建今處

邑厲壇 在景星寺畔舊在縣北一里其各鄉厲土穀壇隨里多寡設之創建無攷嘉靖十四年知縣鄭珊總遷今處

年知縣鄭珊總遷今處

城隍廟 在縣東一百步

蠡山廟 在蠡山上相傳唐光宅間建以祀越相范蠡其女稱武陵娘子亦有祠

湖西廟 在縣西岸大悲寺遺址改建以祀水神

東嶽廟 在縣東一里重修

南嶽廟 在縣南重修

景公廟 在沈家陂上

水府廟 在縣東二里前後高樓節年大水洗崩

皇清康熙三年知縣成明瑞捐俸鼎建

黑衣廟 在縣西五里

五嶽廟 在縣西二里即古大悲寺

楠母廟 在縣東小江口

張公廟 在角碧口

郭公廟 在角碧口祀郭子儀也

許先鋒廟 在水廟側

土地祠 在典史門左

五顯祠 在縣儀門外即寅賓館

沅公祠 在縣西

姚公祠 在縣東

寺觀附

本府 武陵縣附郭

大善寺 在府治東北一里宋熙寧間建後殿郡人楊鶴重修

皇清總鎮楊遇明又重修之

乾明寺 在府治德山上唐咸通間建第五十

三福地也又山上有孤峯臨江郡中勝概

一源寺 在府治十里車橋村梁普通二年建明末焚燬今復重修

二聖寺 在府治清平門外唐同光間副將沈如常疊砌石櫃上設觀音二聖以鎮水勢宋乾道間重建末樂六年重修今復重修

彭法寺 在府治七里橋東周顯德五年建明洪武元年修後廢

廻峯寺 在府治東十里爲本郡卽下關石基上

眞覺寺 卽圓通寺在府治河水驛西三十步唐同光元年建今重修

光福寺 在府治西南五里宋建炎年間建內有沈公臺石碑

高陂寺 在府治西十五里竹灣邊

木瓜寺 在府治東七里元時建

神鼎寺 在府治西三十里郡人楊嗣昌重修

南湖寺 在府治西二十里宋乾道四年建

道林寺 在府治南三十里唐龍紀元年建

金剛寺 在府治西四十里

觀音寺 在府治北陽山東側晉白鹿建今重修

洞泉寺 在府治陽山西側今重修

宇云庚申年秋九月平仲南行至甘泉院僧以詩板示征途不暇吟味代記年月後丁謂過此有詩云翠影人疎度波光琴瑟疑帝家金掌露仙署玉壺冰曉井侵星汲宵廚向月澄豈惟獨沛渴灌頂助三乘

菩提寺 在府治東北七十里元時建

崇福寺 在府治北七十里永受北村

成都寺 在府治北七十里

靜居寺 在府治北六十里

法洪寺 在府治北八十里下新村

末壽寺 在府治北七十里元時建

馬照寺 在府治北八十里元時建明洪武二年重修

文殊寺 在府治北八十里今重修

藥山寺 在府治北九十里今重修

佛光寺 在府治西南五里有沈約嘯臺

慈化寺 在府治西十里

天慶觀 在府治西一里唐時建名乾明元末兵燹今爲道紀司

善德觀 在府治潛水橋南宋嘉定間建

神仙觀 在府治北七十里洩陂村唐時建明洪武初重建

道德觀 在府治河汊山上臨大江今改太和觀

元妙觀 按一統志在府城北

洞陽觀 在府治東三十里宋咸淳間建

靈芝觀 在府治東七十里梁大同七年建以產芝而名明洪武間重修

修真庵 在縣內珠履坊

桃源縣 在縣治東一里宋乾道三年建元末兵燹明時間復修

觀音寺 在縣治西一里宋乾道間建明洪武二年重修

華嚴寺 在縣治東四十里末塘村宋乾道間建明洪武五年重修

西禪寺 在縣東四十里鄒溪市後

雙泉寺 在縣北七十里

白崖寺 在縣西五十里

茅葉寺 在縣西六十里俱高橋村

慈光寺 餘仙寺 俱在縣西四十里沙羅村

鹹泉寺 在縣西六十里

芭蕉寺 在縣西五十里

巖溪寺 在縣西五十里俱土東村

象林寺 在縣西九十里西東村

古城寺 在縣北一百里

長塔寺 去縣九十里
普濟寺 在縣北一百二十里
雲岩寺 在縣北一百十里俱上蘇村
長灘寺 龍池寺 俱在縣北九十里黃沙村
湧泉寺 在縣北七十里黃溪村
龍興寺 在縣北七十里水田村
興國寺 在縣東四十里杜青村
馬頭寺 在縣北五十里馬頭山
真如寺 在縣北七十里莫林村
永興寺 在縣北八十里高橋村
羅漢寺 在縣北一百里上蘇村
香山寺 在縣北一百里香山村
龍昌寺 在縣北五十里莫溪村
龍車寺 在縣北六十里
寶圓寺 在縣南一百四十里白石村
靈峰寺 在縣南七十里鄭家驛後
紅蓮寺 在縣南五十里沉溪渡
青林寺 在縣東十里古司鋪
麻谿觀 在縣北一百里高都村
真源觀 在縣西又名蟠桃觀晉太始間建明
洪武三年修
黃龍觀 在縣北六十里東晉建武元年建明
洪武七年重修
游仙觀 在縣淶羅岩下
靈應觀 在縣北八十里硤州村
桃川萬壽觀 在縣西南二十八里晉人建宋
政和間轉運副使張莊奏請重修勅賜萬壽宮

元嶽行觀 在萬壽宮後宋淳祐元年龍陽富
民文必勝者建施田一百畝給與道士後廢
龍陽縣
南禪寺 在縣南三里
皇清康熙元年洞庭水師協鎮華承恩建爲學宮異
方議者欲移文峰共處
滄溪寺 在縣西滄港枕江帶湖久委榛莽
皇清康熙年間衲僧雄峰復修
義興寺 在縣西北大汎洲康熙四年重修
潭明寺 在縣西潭明湖明末兵燹康熙六年
修
鎮龍寺 在縣東二里臨大江明萬曆庚戌年
建
上林寺 在縣西上小江口
西林寺 俱明末兵燹
皇清順治十二年復修
淨照寺 在縣西一里東晉時建號香積寺唐
咸亨間重建宋淳熙間賜額淨照寺明洪武二
十五年以本寺爲叢林康熙二十二年重修
仁王寺 又爲古佛寺在縣東攀桂坊唐開元
間建明洪武重修康熙二十一年知縣李滋奇
洞庭水師協鎮張世捷守備戴明幹全建邑民
張仲陳嗣昌等募化
龍安寺 在縣南六十里金牛山唐乾明建爲
大叢林明洪武十九年重修經兵燹廢
皇清康熙十一年禪僧上崇率衆度址經營漸次修
復闢山門

崇福寺 在縣南小安村宋紹興間建明永樂
四年重修
白華寺 在縣東二里臨大江明萬曆庚戌年
建今廢
大富寺 在縣南四十里康熙十九年僧照緣
募化重修
白鷺寺 近金牛山
楓林寺 東華寺 今俱重修
景星觀 在縣南半里宋紹興間建明洪武九
年修
鷄鳴觀 在縣西文昌坊宋紹興間建明洪武
十一年重修
乘虛觀 遊仙觀 俱廢
沅江縣
景星寺 明王寺 俱在縣北
滄浪寺 在縣南三十里
烏龍寺 在縣西四十里內有臥龍墨池
常德府驛遞考
府志
武陵縣
府河水馬驛 原止名水驛後歸併故名水馬
驛縣東南一里大江岸明洪武四年知縣張子
源建正廳三間儀門三間大門二間廂房六間
成化八年知縣徐必敷於廳後建水亭三間成
化九年知府楊瑄遷舊亭於西北鼎建正廳五
間扁曰皇華後爲退居翼以寢室弘治九年知
縣應能增修嘉靖八年奉例將和豐馬驛歸併

乃改本驛為水馬驛甚為省費但地瀕大江居雜商市無芻牧餘地今館舍盡廢

和豐馬驛 在縣北二里洪武四年知縣張子源建嘉靖八年裁革

大龍馬驛 在縣北六十里舊在蹇家坪洪武十五年馬夫文祖等告以風水不便遂遷今處嘉靖八年知府方士重修

總鋪 在府前

毛公鋪 馬步鋪 杜木鋪

白沙鋪 在東路四鋪達龍陽縣

佛子鋪 南湖鋪 在西路二鋪達桃源縣

石橋鋪 清泉鋪 陽山鋪

韓僧鋪 折橋鋪 大龍鋪

馬鞍鋪 柿子鋪 在北路八鋪達澧州

桃源縣

桃水馬驛 在縣西南二里明洪武十四年建今修

涿羅水驛 在縣南半里嘉靖七年併於桃源驛

鄭家馬驛 在縣西南七十里洪武四年建今重修

新店馬驛 在縣西南一百三十里按桃源鄭家新店初制原設三驛後歸併烟莊每站程途百有餘里人馬疲於奔命康熙二年巡撫周召南題請復興舊制每驛相去六十里鄭新重整招集居民接應稍便但可虞者每驛人戶寡小驛遞往來不絕宜思永久之計使驛不困乃可

耳

高都水驛 在縣西一百二十里舊在縣南三十里烏水村故鄉驛明洪武二年改此更今名

總鋪 在縣前

古師鋪 延泉鋪 鄒溪鋪

高吾鋪 呂真鋪 在東路五鋪達本府

涿羅鋪 白馬鋪 桃川鋪

烏頭鋪 唐林鋪 沉溪鋪

竹瓦鋪 吉陽鋪 燕莊鋪

長版鋪 竹老鋪 唐地鋪

新店鋪 太平鋪 蘇坊鋪

寧鄉鋪 楊家鋪 末灣鋪 在西

路十八鋪達辰州府

龍陽縣

河池水馬驛 在縣江北明洪武三年建舊為水驛嘉靖九年改為水馬驛萬曆三十八年本府署印推官智幾先改建西關外其故址猶存

龍潭驛 在縣南七十里即名龍潭橋原龍陽益陽相隔一百三十里驛遞最遠難於應遞議於橋邊添設本驛兩縣各加夫五十名馬二十五正在驛應遞往來夫馬人等庶可答應而民

力不疲矣

武口水驛 在縣東北一百二十里吳元年創建明成化七年知府楊宣改遷以避水患知縣周建重修仍築基高四尺有餘而水患可免

總鋪 在縣前

張家鋪 南疆鋪 在東路二鋪達沅江

縣

滄口鋪 黃鎮鋪 宣布鋪 在西

路三鋪達本府

押東鋪 望城鋪 小塘鋪

東倉鋪 毓德鋪 常崙鋪

澄清鋪 軍山鋪 在南路八鋪達益陽

縣

沅江縣

按縣志邑治極僻不設驛其驛站紅船銀兩每年協濟桃鄭二驛已全解驛道止有縣前鋪馬公鋪河渡鋪白駝鋪送縣下行上申公文每鋪額設鋪司鋪兵總領工食載在全書惟縣治濱江驛路鞍馬勞苦多從水路需應差船民甚苦之

皇清康熙二十三年蒙憲給示禁止稍稍斂輯矣

總鋪 在縣前

馬公鋪 河渡鋪 白駝鋪 在西

路三鋪達龍陽縣

常德府兵制考

本府 武陵縣附郭

守備一員 總理一衛屯政掌印左漢右滿俸銀每年二十七兩三錢九分四釐薪銀每年七十二兩蔬菜燭炭八兩案表家伙八兩心紅紙張八兩書辦門子快手半役傘馬夫等工食通計年終共銀二百二十二兩九錢九分四釐此酌定經費額數也至於內奉裁減書辦名數等項不悉詳扣數目以俟後復焉

府志

方輿彙編職方典第一千二百五十九卷常德府部

第一六〇冊 之〇五葉

千總三員 其俸薪書辦門子牢役傘馬夫共銀一百一十五兩九錢六釐本衛奉例一名員今裁

拖沙喇哈番二員 應襲原駐入鑾儀衛改駐常德衛各食俸銀八十八兩

經歷司一員 其俸薪等項共銀一百五兩九分六釐今併缺俱裁

桃源縣志

演武場 在縣東門外半里

操演民壯一百七十名

團堡 在上下坊設立兵器未定數

冷鋪 在上下坊設立火夫遇夜看守

按冷鋪之設本爲巡警明末多爲奸猾侵占民壯之設本防寇盜亦止供勾攝差遣之用又市棍包攬人少數多故武備廢弛近演武場團堡冷鋪俱廢

龍陽縣志

順治十一年增設洞庭水師副將一員原駐湘陰三峰窰是年移龍陽

康熙九年安插投誠海兵於縣東龍潭橋等處開墾荒蕪田地另名建陽村欲藉爲民祠遭吳逆變亂遷徙不定故迄今尚未起科

沅江縣志

沅邑僻壤在洞庭西以湖溝逶迤漁艇出沒四郊盡白蘆荒草居民落落晨星有文事必有武備有疆隅要害必有資於防禦明常德衛委點哨官分哨防守卽以本衛千百戶充其選至

皇清廢衛哨官亦裁乃於縣治設水塘三屬龍陽水師營設旱塘二屬常德協鎮營旱汛一駐縣市一駐毛角口崙管旱路在縣防守倉庫縣治在鄉防禦四鄉九保各委百總一員論季踐更水塘一駐白沙冬移駐富池一駐大神潭一駐瓦石磯崙管江湖防守巡汛三塘內二塘皆常德境洞庭湖界惟瓦石磯一塘爲長沙協鎮交界之所龍陽水師營以瓦石磯爲頂塘長沙協鎮營以八字哨爲頂塘適中有彭池港爲交界會巡之地前此互諉不決至康熙二十四年立界牌於港口二十五年又奉委署常德府張檄益陽知縣邱仲沅江知縣顧智公同踏驗彭池確爲適中之地奉憲文兩營汛防乃定

欽定古今圖書集成方輿彙編職方典

第一千二百六十卷目錄

常德府部彙考六

常德府物產考

帝德府古蹟考 陵墓附

職方典第一千二百六十卷

常德府部彙考六

常德府物產考

府總

穀屬

稻 爾雅稌稻說文謂稻爲梗爲糯又云粳稻

粘而糯稻不粘其名不一亦不能悉載也

蕎 稗紅花白有甜苦二種

麻 可榨油有紅黑黃白之別

蔬屬

芥 味辛辣有青紫二種

莧 凡莧性冷食之宜和以蒜

白菜 形如芥菜但莖大而葉薄

蘿蔔 本草名萊菔

苦蕒 葉似波蕒差大詩薄言采芑卽此菜也

茼蒿 三四月開花如黃菊而小

藜蒿 生於湖岸

蒿苳 種出倭國

帶菜 臨春卽生

油菜 結子可榨油因名油菜

蒜 苗如葱針味辛大而獨子曰胡

茄 一名落蘇又名峴喻瓜

韭 說文云一種而久故謂之韭

薤 葉似韭根似蒜

葱 有燕葱樓葱二種

芋 本草名土芝東坡謂玉糝羹

西瓜 近始出

胡荽 一名芫荽

白花菜 其色略如野莧

芹 本草作蘄一名水英

苦瓜 雖苦而以之調諸肉則苦不侵

蕨 爾雅謂蕨藟可爲菜茹其根磨之可作糕

菱 一名菱白生池中

蓴 秋種冬茂葉微厚而光

波稜 葉稜而光澤微似馬蘭

鬼芋 葉如南星卽張騫之蒟醬也

果屬

桃 有數種

李 其名甚多

杏 花殷紅淡白

梅 品有二山梅實最繁而小品梅花千葉每

一花三實

柑 孔安國疏小曰橘大曰柚皆柑也

芡 生水澤中又名雞頭實

枇杷 一名盧橘

棗 樹高多刺

栗 木類櫟花青黃色

榴 味甜出西域張騫爲漢使得種子安石名

曰榴

楊梅 木似荔枝

木瓜 葉厚如桂味酸似梅

菱 卽芡實

藕 卽蓮根

葶薺 爾雅云薺薺多生于田苗如龍鬚

櫻桃 爾雅云櫻本本草云崖

胡桃 樹高外剛內柔

郁李 本草云名鬱李

蒲桃 藤生一名馬乳

銀杏 一名鴨脚子

林禽 一名來禽味甘來衆禽也一名花紅

花屬

辛夷 一名木筆

玉簪 一名白鶴素質而秋華狀類玉簪

紫荊 木似林禽紫艷可愛

瑞香 花如丁香一名錦薰籠

山丹 其花深紅色

木香 蔓生有刺與茶藨相似花小而繁

剪金 花如金茸全類剪刻

滴滴金 葉露滴地而生

石竹 叢生高尺餘

扁竹 春生苗高二三尺華似鹿葱

牡丹 名鼠姑一名尺藥葉大如掌花如大碗

山茶 有寶珠單葉二種

茉莉 叢生夏開白色重瓣清麗而芳

蓮花 俗名荷花爾雅云芙渠又名水芝

萱草 俗呼鹿葱一名忘憂一名宜男

梔子 一名薝蔔花一名玉樓春

薔薇 藤生青莖多刺花有紅紫粉三色

芙蓉 一名拒霜八九月開故名有紅白二色

有單瓣者有重瓣者朝開色白至午後漸紅者

名醉芙蓉又名添色芙蓉

雞冠 紫白二種春種秋開莖高三五尺

金鳳 花如飛鳳一名鳳仙花其子作房生微

觸即罅裂俗呼急性子

木犀 一名嚴桂有丹黃白三色其香最清取

入茶蓋茶冷桂熱性實相濟

菊 爾雅云冶薔本草云節華其品不一各號

各別有百種

木槿 一名日及花俗呼爲懶插籬

夜合 一名合昏一名合歡

百合 根類胡蒜花色淺黃本草云摩羅一名

中逢

蘭 黃山谷云一幹一花而香有餘曰蘭一幹

七八花而香不足曰蕙

葵 爾雅云一名戎葵蓋戎蜀所自出故名

芍藥 花二種有草芍藥有木芍藥

碧桃 樹矮無實

絳桃 花色最紅

繡毬 樹高三四尺蓓蕾相聚如毬純白如銀

海棠 花如紫錦有垂絲硃砂二種

水仙 葉如蒜故一名雅蒜一莖數花

酴醾 蔓生有刺承之以架花白而香

紫薇 按龍陽縣志道旁皆生

杜鵑 按龍陽縣志山中遍出名艷山紅

虎刺 按龍陽縣志高不逾尺花白子紅因多

刺俗名鳥不踏

草屬

通草 一名附枝一名丁翁生山間

三脊茅 書云包匭菁茅春秋齊桓公責楚包

茅不入無以縮酒宋大中祥符元年遣使沅江

采三脊茅三十束有老人王皓識之補州學賜

以粟帛

浮萍 舊傳桃花入井經宿成又云楊花所化

艾 攻百病惟蘄州者佳

蘆 生江岸

藍 有木藍水藍萬藍數種用以取靛

蘋 比蓼大花白

蓼 生淺水澤中名水紅花詩所謂隔有遊龍

是也

蒲 其葉似艾可去燈烟一名書帶草

芭蕉 葉碧而脆

谷精 一名戴星草

馬鞭 圖經云生濕地花紫色

虎耳 生石上

鳳尾 生牆垣間俗呼竹葉菜

木屬

松 樹極高大其皮如鱗俗呼老龍鱗

柏 其種不一性最堅

楓 葉似白楊爾雅云攝攝蓋攝攝楓別名

槐 葉細枝脆綠陰最濃

蠟樹 其葉常青四時不改即冬青樹綴蟲生

蠟故又名蠟樹

柳 葉長而青枝幹與楊同類

楊 葉圓闊而赤多生水岸

栗樹 實名栗橡其殼可染色

烏柏 葉似梨而小可榨油爲燭搗根可醫中

滿病

苦楝 花小枝脫木可造器

楮 種類頗多結實可食堪作棟宇山海經云

作屋柱難腐

椿 樹極高葉香者名香椿臭即樗也

楮 詩謂之穀皮可造紙最易生

桑柘 人家所植者謂之桑山中所生者謂之

柘皆可飼蠶

柞 木堅韌可以爲弓梢弩幹車具

樟 名豫樟木高大葉似柏

棕 名櫟性堅

黃楊 葉綠色冬夏不凋每歲長一寸遇閏年

則縮一寸東坡所謂唯有黃楊厄閏年是也

皂莢 生莢如刀豆去油垢

栝 柏葉松身

梓 似桐葉小花紅堅韌光澤取爲材最美

杉 木類松而勁古葉附枝生若刺針

桐 爾雅云觀一名梧結子如胡椒可食曰梧
桐一名桐結子可榨油曰桐油一名水桐可造
屋爲柱爲板

檀 花黃葉似槐而性堅實可以爲弩
榆 葉拋錢花作雪是謂之榆

竹屬

白竹 按龍陽縣志近皆遍地開花

叢竹 四時生笋又謂之孟宗竹

鳳尾竹 葉細而長形似鳳尾

斑竹 節間有斑點相傳種自君山

方竹 短小形方節有小刺

金竹 其色金其抽枝處仍碧

篠竹 箭竹書曰篠簜既敷

藥屬

前胡 苗似蒿味苦微寒能下痰

桔梗 葉似杏而花紫氣微溫味辛苦治肺經

黃連 叢生一莖三葉高一尺許葉冬不凋性

寒治痢本草云澧州與雅州者勝每枝重而大

小相連謂之鶴膝蜂腰者爲上

車前子 大葉長穗生道旁俗呼爲蝦蟆草卽

詩所云采采芣苢者是也味甘酸寒無毒治泄

瀉

何首烏 一名野苗一名交藤味苦澀微溫無

毒因何姓人服之首烏故名此地間出僅彈丸

大

金銀花 一名忍冬花有黃白色故名

菖蒲 一名堯韭如劍生湖澤間嫩者可鮮食

詩所謂惟笋及蒲是也生石上者一寸九節入
藥性溫寧心平胃

葛粉 卽葛根土人掘之以濟荒歉性寒能解

鳩毒

益母草 一名野天麻生田野園圃間方莖開

白花花生節間能治產難故名益母草

澤蘭 葉似菊而尖長其香如蘭味苦性微溫

一名龍葵一名虎蒲

麥門冬 叢生冬夏色碧根生連珠形似穠麥

類故名性涼清心去熱

桔樓 爾雅云天瓜本草云地樓蔓生花淡黃

色實在花下根謂之天花粉性涼解毒化痰

香薷 一名香葉似白蘇葉細生山谷石上者

佳性微溫能祛暑

荆芥 莖高一二尺開花成穗一名假蘇以香

氣似蘇味辛溫能解熱去風

紫蘇 其種有二一葉圓一葉尖紫色者甚香

入藥夏採莖葉冬採實

倉耳 詩云卷耳性溫去毒

香附 莎草根也俗云回頭春生園圃間小者

不堪用間有大者能下氣開鬱

半夏 獨莖端出三葉淺綠色頗似竹葉而光

根下相連有毒性溫利膈化痰

天南星 有毒性煖去痰定氣

葶麻 根亦有節高丈餘秋生細花結實

薄荷 葉稍圓而尖經冬不枯唯似金錢者勝

茴香 叢生葉細莖粗性溫能下氣

黃精 根葉大概似薑博物志太陽之草名黃
精食之令人長生太陰之草名勾吻不可食

牽牛 蔓生籬落間有毒下氣破積

川芎 節大莖細葉香一名藤蕪

旋覆 葉如水蘇花黃如菊

黃柏 其皮入藥

決明子 苗高三四寸葉如苜蓿而大能明目

連翹 本草有大小二種性涼解毒

續斷子 一名千金子有毒除痰

金櫻子 子小而圓煉之止泄

茱萸 葉似椿而闊實似椒子性溫行氣

淫羊藿 一名仙靈毗又名三枝九葉草根如

黃蒼木而多鬚蘇頌言湖湘出者葉如小豆枝

莖緊細經冬不凋是也

地榆 葉似榆葉而狹長兩邊作鋸齒狀根形

略似胡蘿蔔而瘦

劉寄奴草 莖四方方處有稜如細線葉皆逐

節相對而生漸出岐枝開花結實作角湯火金

瘡咸用之

丹參 四方有節方處有毛鋸人俗呼鋸子草

金頂龍牙草 葉微似菊莖端出穗數寸許開

小黃花纍纍然若鞭節之形蓋馬鞭草一名龍

牙一名鳳頸皆因穗取名草實與相類而馬鞭

花紫此草花黃故有金頂之目云

海金沙 大者如繩細者如線葉上多皺皺處

有沙採得視紙曬之黃細如粉主利小腸等病

稀莨 有二種一種莖青碧葉而圓大莖臭折

之氣逆人鼻一種莖青梢紫碧葉稍狹長亦不甚臭而莖皆有直稜葉皆對節

天門冬 莖如釵股有逆刺生枝節一莖數十枝甚疎秀

威靈仙 莖有細稜如絲莖相去數寸對節生枝葉在枝杪

五加皮 類荊條有刺又類薔薇高者丈餘葉五出結子如豆霜後作紫黑色根皮黃黑肉白骨硬治風濕壯筋骨功力甚深

貨屬

棉花 一名木綿樹

炭 有黑白二種

茶 深山有之出石中者佳

酒 其名不一

麻 有苧葛二種

布 綿布葛布

蠟 黃者蜂所釀名黃蠟白者樹所生煉之成

鱗屬

鯉

陶隱居云魚王唐人謂之赤鯉

鯖 似鯉而背青色

白魚 版身肉美少陵詩云白魚切如玉

鰕 巨口細鱗頭大身促

鯢 首尖身長

鮠 形似鯉青黑色畜於池飼以草名草鮠

鱧 小口細鱗身扁而色白

鱖 狀如鱧而頭差大

鱧 本草作鱖俗呼為黑魚

鮎 本草曰鮎大首方口無鱗多涎

魮 似鮎而小腮邊有刺

鰻 山海經所謂刀魚是也

鰻 形扁口銳項縮味甚肥美

鯽 一名鮓形似鯉而小色稍黑體促而腹大

鰱 卑雅云似鱈而短無鱗

鱖 形似鰱而細長亦似蛇

鮓 骨纖且多肉膩而味甚腴四五月出龍陽

以下皆無

花魚 一名鱖魚似鰱而短

鰕 有數種田澤生者最小

鰕 似鰕而頭大色青黃腹下白無鱗

全魚 狀似鯉而小大不過二三指許

介屬

龜 俗呼團魚鼈之所在必有浮沫謂之鼈津

龜 爾雅云甲蟲三百六十而龜為長史記云

龜千歲巢于蓮葉上

蚌 大曰蛤小曰蜆

螺 類不一性凉能解暑毒

蟲屬

蜂 蜜蜂色黃而小作房採花釀蜜卑雅云蜂

有兩衙應衛其王一種純黃而長螫人尖銳

蝶 一名蛱一名蝴蝶

蚯蚓 土精無心之蟲老則白頸一名地龍

螢 月令腐草為螢夜飛腹尾下有光

蛙 一名蝦蟆

蟻 一名元駒有君臣之義穴地作巢

蝙蝠 一名伏翼似鼠而小有肉翅日伏夜飛

蟬 詩五月鳴蜩本生草中夏至則登木而蛻

秋鳴為蟬

蠅 前足有絞繩之狀故字從繩詩人以刺讒

歐公以比小人

蜥蜴 似蛇而四足尾青碧生草澤中一名蛇

師一名石龍子又名蜥蜴又名守宮

蝻斯 蝗屬長而青長角長股一生九十九子

能以股作聲

螟蛉 桑樹上小蟲也詩有云螟蛉有子蜾蠃

負之

螳螂 青色頭似蜻蜓其背如鋸爾雅云螳螂

深秋乳子夏初乃生一生百子

蜈蚣 頭有珠大小長短不一最毒傷人

蛇 按卑雅蛇蟠常向壬壬北方也又曰蛇以

眼聽其類甚多

蝸牛 背負殼狀如小螺驚則縮入殼中頭有

小角故名多涎在壁

鳥屬

鷄 易異為風為鷄鷄鳴五更者日將至異位

感動其氣而鳴也

鵝 一名舒雁卑雅云鵝伏隨日東坡云鵝能

警盜亦能卻蛇

鴨 家畜曰鴨野鴨曰鳧

鴿 一名鴿鴿雀四時有子鴿逐月生子

雀 即麻雀依人簷隙間壘巢

鴈 形似鵝大曰鴻小曰鴈知陰陽之升降按少長之行序又唐本注曰鴈得中和之氣熱即北寒向南以就和氣故為禮幣者一取其信一取其和

鳬 水鳥似家鴨而小色青尾長卑脚短喙

鳩 有數種斑鳩天將雨則雄喚雌穀鳩陰則逐其雌晴則喚之皆性拙寄巢生子

喜鵲 淮南子云鵲結巢知太歲所在其歲多

鴉 純黑而反哺者名慈烏身烏而頸白者名

夕鳥亦名鸛詩云弁彼鸛斯又一種似鳥而小

羣飛作啞啞聲名慈鴉今謂之寒鴉

鷹 鷲鳥也一名爽鳩蒼黑色頂有毛角微起

七月則取禽以祭

雉 易曰離為雉書曰華蟲漢避女后諱改雉

為野鷄

百舌 其聲嬌婉兼衆鳥音臨春始鳴夏至反

舌

鶯 詩倉庚疏云黃鶯又名黃鸝黃公東坡云

苦厭黃公聒晝眠

燕 詩元鳥記曰乙鳥陶隱居云胞紫身小為

越燕胞斑黑而聲大者為胡燕

鷺鷥 一名屬玉大曰鷺小曰鷺人畜之及馴

每至白露降日則飛揚而去故俗呼白露

鷺 即鷺鷥杜工部賦云將精於金骨立如鐵

目通於腦筋入於節風勁則高飛戾天

鵝 狀如鴈尾稍短善擊鳬雁其種不一

鵲 似雉色白長尾皆有細黑文性閑雅故名

鵲 似鴉而小穴居金眼純黑剪其舌可學

語俗名八哥兒

鵲 此鳥無常居而有常匹性善鬪

鷺鷥 鳬類雌雄不離所謂紫山交頸寒塘並

飛也

山鵲 一名山鵲尾長色碧嘴距皆紅

杜鵑 一名陽雀一名子規夜鳴達旦血漬草

木始鳴向北啼苦則倒懸於樹說文謂蜀帝所

化至今寄巢生子百鳥為哺其雛尚知君臣

畫眉 似鶯而差小色褐眉白善鳴好鬪梅聖

俞詩云山鳥本無名兩眉如粉畫

蠟嘴 似雀而大其喙如鵲色黃故名

叫天 善鳴鳴愈疾飛愈高

啄木 爾雅鴛雌褐而雄斑喙長寸許常啄木

索蟲食蟲不出則以喙畫木如符篆其蟲即出

白頭翁 似雀而大以其頭有白點故名

鵲 一名離渠水鳥也有急難義故棠棣詩

取以比兄弟

紅鵲 類鵲而喙長色紅淺白

竹雞 俗呼泥滑滑或云白蟻聞其聲即化為

水

稻雞 飛鳴宿食皆于禾間

布穀 似鵲尾長牝牡飛鳴一名戴勝春暮鳴

曰割麥插禾俗呼催耕鳥

青翠 其羽可剪為花

鬼車 遇陰晦則飛鳴或云鬼車十首一為犬

獸屬 斷人聞其聲則擊犬鳴以厭之

牛 易坤為牛陰物也其性緩而和有水黃二

種

羊 曲禮曰柔毛

虎 遊山莽間其風颯然以從故曰風從虎蓋

風木也虎金也木受金制也

鹿 色黃有白點

麋 爾雅謂麋崔豹古今注麋有牙不能噬

鹿 形類麋其皮可為人履鳥

兔 兔生缺唇前兩足短後兩足長其行必跳

埤雅云口有缺吐而生子故謂之兔又曰兔者

明月之精視月為孕故曰明視

猴 俗呼胡孫詩謂之猿性躁而多智

獺 水居青黑色身如伏翼善食魚孟春取魚

于水四方陳之進而弗食故謂之獺祭魚

野豬 一名封豕狀似家猪腹小脚長毛褐色

牙利如鎌又有毫猪毛黑如錐鬃有刺怒則奮

以射人

狼 大如狗鳴則七竅出聲埤雅云狼遠逐食

必先倒立以下所向起臥遊戲多藉草草皆亂

故曰狼藉

熊 形類犬豕而性輕健好攀緣上樹見人則

自投而下背上有脂曰熊白夏月則無其脂入

藥明目